

U ovom broju, između ostalog, čitajte:

- **Udruženje poslodavaca u FBiH:
Smanjenje doprinosa i najava
novih mjera**
- **Održane konsultacije Udruženja
poslodavaca sa delegacijom
Međunarodnog monetarnog fonda**
- **Predstavnici UPFBiH održali
sastanak sa ministrom trgovine
FBiH**
- **Održane konsultacije sa
Federalnim ministrom zdravstva**
- **Poslodavci iz Kantona Sarajevo u
razgovoru s predstavnicima Vlade
KS: Potrebna snažnija podrška
privredi i konkretniji koraci u
realizaciji strateških projekata**
- **Potpisan Memorandum o saradnji
između Udruženja poslodavaca
FBiH i Slovenskog udruženja
privrednika u BiH**



Udruženje poslodavaca u FBiH: Smanjenje doprinosa i najava novih mjera



Udruženje poslodavaca u Federaciji Bosne i Hercegovine podsjeća poslovne subjekte i širu javnost da se od sutra počinju primjenjivati izmjene Zakona o doprinosima. Tim izmjenama smanjuju se stope doprinosa za 5,5 posto, čime se one snižavaju sa 41,5% na 36%. Također, na snagu stupa Pravilnik o načinu obračunavanja i uplate doprinosa, koji operacionalizira primjenu ovih zakonskih izmjena.

Na današnjoj sjednici Ekonomsko-socijalnog vijeća za teritoriju FBiH najavljeni su naredni koraci u pravcu dodatnog smanjenja doprinosa na teret poslodavaca kroz donošenje druge faze izmjena Zakona o doprinosima i donošenje Zakona o fiskalizaciji transakcija u FBiH, kao i produženje važenja Uredbe o isplati pomoći radnicima od strane poslodavaca, čije primjena bi do kraja jula trebala biti produžena.

Udruženje poslodavaca u FBiH koristi priliku da pozove poslodavce u FBiH da u sklopu sa mogućnostima iskoriste smanjenje doprinosa s ciljem povećanja plaća svojih radnika i olakšanog ulaska u drugu fazu dogovora vlasti, poslodavaca i sindikata na stvaranju povoljnijeg poslovnog ambijenta donošenjem novih propisa iz oblasti fiskalne politike, zdravstvenog osiguranja, radno-pravnih odnosa i drugo.

Održane konsultacije Udruženja poslodavaca sa delegacijom Međunarodnog monetarnog fonda



U službenim prostorijama Udruženja poslodavaca 27. juna 2025. godine održane su konsultacije sa delegacijom Međunarodnog monetarnog fonda koju je predvodio šef Misije MMF-a u BiH David Amaglobeli.

Predstavnici MMF-a naglasili su važnost konsultacija sa svim ekonomsko-socijalnim partnerima u FBiH, te se tom prilikom zahvalili predstavnicima Udruženja poslodavaca na dosadašnjoj uspješnoj saradnji. Ispred Udruženja poslodavaca sastanku su prisustvovali

- Mario Nenadić, direktor Udruženja poslodavaca u FBiH
- Safudin Čengiđ, predsjedavajući ESV-a FBiH, član upravnog odbora Udruženja poslodavaca Kantona Sarajeva, član delegacije ESV-a u Kantonu Sarajevo
- Ećo Suad, predsjednik Udruženja poslodavaca Kantona Sarajevo, član delegacije ESV-a Kantona Sarajevo
- Riad Hasić, predstavnik kompanije TMD Gradačac – članice Udruženja poslodavaca u FBiH
- Mersiha Jusić, sekretarka Udruženja poslodavaca u FBiH

Predstavnici UPFBiH upoznali su predstavnike MMF-a o stanju u poslovnom okruženju u FBiH i naporima koje socijalni partneri u FBiH ulažu na poboljšanju tog stanja. Pozitivnim je ocijenjeno ponovo pokretanje rada ESV-a FBiH čime je unaprijeđen okvir za konsultacije i dijalog o problemima u poslovanju, te prilikama za unapređenje poslovnog ambijenta.



Poslodavci su pozitivnim ocijenili pokretanje seta fiskalnih reformi i s tim u vezi napravljenim prvim korakom donošenja zakona kojim je smanjenja stopa doprinosa na plate za 5,5 indeksnih poena, odnosno 13,5%. Do kraja godine dogovoreno je donošenje novog Zakona o fiskalizaciji transakcija u Federaciji BiH i druga faza smanjenja doprinosa na ispod 30% a čija se primjena očekuje od 01.01.2026. godine.

Za poslodavce važne promjene očekuju se u sektoru zdravstvenog osiguranja po pitanjima smanjenja troškova bolovanja radnika na teret poslodavca, te promjena vezano za troškove liječenja radnika i u odnosu na krivicu poslodavca za povrede radnika i mjesto nastanka povrede radnika, te u konačnici pitanja neefikasnog modela reosiguranja troškova liječenja u FBiH.

Povećanje cijena električne energije, spore reforme na tržištu rada, velika socijalna izdvajanja, povećanje troškova u javnom sektoru, neusklađenost politika i propisa u BiH sa EU, pitanja CBAM-a, problema vezano za parafiskalna opterećenja privrede su neka od pitanja o kojima se danas detaljno razgovaralo, a koja značajno utječu na poslovanje u FBiH.

Poslodavci su upozorili da će određene odluke i politike EU značajno utjecati i usložiti poslovanje kompanije iz oblasti transporta, ali i izvoznika iz BiH generalno, te s tim u vezi podsjetili na probleme Uredbe pod okvirnom nazivom „90/180" tj. limitu boravka od 90 dana u periodu od 180 dana naših radnika vozača na prostoru EU.

Velika, nerealna konkurencija domaćoj privredi svakako je nedovoljno kontrolisano sivo tržište, naglasili su poslodavci, te u tom kontekstu iskazali posebna iščekivanja kroz najavljeni proces fiskalizacije čime bi kao jedina zaštita od ovog problema bila fiskalizacija u realnom vremenu i u širokom obuhvatu fiskalizacije što bi povećalo javne prihode, olakšalo rad legalnih poslodavaca i generalno unaprijedilo poslovno okruženje.

Poslodavci su zatražili podršku MMF-a i po pitanju potrebe unapređenja procesa digitalizacije, radnih migracija i brojnim drugim pitanjima, a posebno je apostrofirana „ranjivost" malih poslodavaca i obrtnika koji se puno teže nose sa ovim pitanjima.

Predstavnici UPFBiH održali sastanak sa ministrom trgovine FBiH



Predstavnici Udruženja poslodavaca u FBiH održali su 10. juna 2025. godine redovni sastanak sa ministrom trgovine FBiH Amirom Hasičevićem na kojem se razgovaralo o aktuelnim pitanjima iz oblasti trgovine, s posebnim naglaskom na „zaključane cijene" i mjere kontrole cijena.

Ministar Hasičević kazao je da je tekst prednacrtu Zakona o zaštiti potrošača pripremljen, te da ide u proceduru.

"Kako je riječ o obimnom zakonu, u potpunosti usklađenom sa europskim direktivama, tekst će biti objavljen za javne konsultacije u narednih deset dana, nakon čega će biti upućen na sjednicu Vlade Federacije BiH, a potom i u parlamentarnu proceduru" naveli su iz Ministarstva.

Tokom sastanka su razmatrane i primjedbe na Nacrt Zakona o kontroli cijena. Pojedine primjedbe su ocijenjene kao opravdane i bit će ugrađene u tekst prijedloga zakona.

Također, ministar Hasičević i predstavnici Udruženja poslodavaca u FBiH su razgovarali o Odluci Vlade Federacije BiH o mjerama neposredne kontrole cijena na teritoriji Federacije BiH čiji rok primjene je produžen.

Predstavnici Udruženja poslodavaca u FBiH ukazali su na problem održavanja cijena pojedinih proizvoda. Dogovoreno je da će se obaviti razgovori i sa dobavljačima kako bi se pronašlo najbolje rješenje.

Ministar Hasičević najavio je i projekt izrade nove aplikacije za praćenje cijena osnovnih životnih namirnica.

Na sastanku je dogovoren nastavak saradnje kroz zajedničke radne grupe i Savjet za trgovinu o ovim pitanjima.

"Federalno ministarstvo trgovine nastavlja dijalog sa socijalnim partnerima, a kako bi zakonska rješenja bila uravnotežena, provodiva i usmjerena ka unapređenju poslovnog ambijenta i zaštiti prava svih učesnika na tržištu" naveli su iz Ministarstva.

Produžena mjera "zaključavanja" cijena do 01. septembra



Vlada Federacije Bosne i Hercegovine, na prijedlog Federalnog ministarstva trgovine, donijela je [Odluku o produženju mjera neposredne kontrole cijena na teritoriju Federacije BiH](#), kojom se ograničavaju maloprodajne cijene za 65 osnovnih proizvoda.

Odluka se primjenjuje od 1. juna i ostaje na snazi do 1. septembra ove godine.

Ova mjera, poznata kao Odluka o "zaključanim" cijenama, prvobitno je donesena krajem februara 2025. na razdoblje od tri mjeseca, a sada je produžena za dodatna tri mjeseca, počevši od 1. juna.

Popis proizvoda na koje se odnosi ova odluka ostaje nepromijenjen.

Kako je saopćeno iz Federalnog ministarstva trgovine, cilj produženja ove mjere je očuvanje ekonomske stabilnosti, zaštita životnog standarda građana i sprječavanje neopravdanog rasta cijena osnovnih životnih potrepština.



Privredni subjekti registrirani za obavljanje trgovine na malo obavezni su poštovati propisane maksimalne maloprodajne cijene za artikle sa spiska. Pravni subjekti moraju osigurati primjenu zaključanih cijena za sve proizvode iz prve grupe i najmanje 15 proizvoda iz druge grupe prema vlastitom izboru.

Fizičke osobe registrirane za maloprodaju dužne su primijeniti maksimalne cijene na najmanje deset proizvoda iz prve grupe. Ukoliko neki proizvodi iz prve grupe nisu dio asortimana, nije ih nužno naknadno uvoditi, čime je omogućena određena fleksibilnost trgovcima.

U slučaju da proizvodi nisu dostupni u propisanom pakiranju, trgovci ih mogu ponuditi u većim pakiranjima, uz uvjet da njihova cijena ne premašuje određenu "zaključanu" cijenu, bez obzira na gramažu ili litražu.

Kako bi se osigurala transparentnost, trgovci su dužni uz maloprodajnu cijenu jasno i čitko istaknuti vizualnu identifikacijsku oznaku, te na ulazu ili unutar prodajnog objekta i na službenim internetskim stranicama postaviti plakat s popisom artikala, uključujući prethodnu (redovnu) i "zaključanu" cijenu svakog proizvoda.

Održane konsultacije sa Federalnim ministrom zdravstva




U Ministarstvu zdravstva FBiH 24.06.2025. godine održan je sastanak predstavnika Udruženja poslodavaca u FBiH i ovog ministarstva. Sastanku su prisustvovali ministar zdravstva Rimac Nediljko sa saradnicima i direktor UPFBiH Mario Nenadić te sekretarka Udruženja Mersiha Jusić.

Sastanak je organiziran u skladu sa inicijativama Udruženja poslodavaca i zaključcima Ekonomsko-socijalnog vijeća FBiH, a vezano za određene izmjene Zakona o zdravstvenom osiguranju. Predstavnici Udruženja upoznali su ministra Rimca o nekoliko pitanja vezano za dužinu trajanja bolovanja na teret poslodavaca, isplate naknade plaće u slučaju povrede na radu i profesionalne bolesti na teret poslodavca i pitanje reosiguranja.

Učesnici sastanka složili su se da je neprihvatljivo zadržavanje u zakonu postojećih odredbi prema kojima troškovi ukupnih bolovanja radnika do 42 dana padaju na teret poslodavca što je jedinstveno rješenje u širem okruženju i svakako je neophodno u okviru sistema iznaći rješenja da se značajno rasterete poslodavci po ovom osnovu



preuzimanjem rješenja susjednih i drugim zemalja, a sve u skladu sa mogućnostima u FBiH, odnosno da se značajno rasterete poslodavci po ovom pitanju smanjenjem dana bolovanja na teret poslodavaca na 15 dana, a da teret isplate ostatka bolovanja preuzmu fondovi zdravstvenog osiguranja.



Također, poslodavci godinama ukazuju neprihvatljivost rješenja iz Zakona o zdravstvenom osiguranju i očekuju da se oslobode obaveze snošenja tereta isplate plate u slučaju povrede radnika do koje nije došlo na radnom mjestu i koja nije rezultat radnog angažmana uposlenika.

Prema sadašnjoj regulativi ako se radi o povredu na radu bez obzira na to je li poslodavac kriv ili ne za tu povredu poslodavac plaća kompletne troškove liječenja za tog radnika, plaća bolovanje u stopostotnom iznosu plaće, neograničeno dok ne ozdravi ili dok komisija ne utvrdi stepen invalidnosti i ne vrati ga na posao bez obzira koliko to trajalo.

Učesnici sastanka približili su stavove po predmetnim pitanjima i zaključili da će o istima informisati članove Ekonomsko-socijalnog vijeća na sjednici iduće sedmice i u odnosu na te zaključke pokrenuti odgovarajuće izmjene Zakona o zdravstvenom osiguranju.

Tokom sastanka razgovarano je i problemima zdravstvenog osiguranja, funkcionisanju fondova, problemima zloupotreba bolovanja i drugim vezanim pitanjima.

Potpisan Memorandum o saradnji između Udruženja poslodavaca FBiH i Slovenskog udruženja privrednika u BiH



Udruženje poslodavaca u Federaciji Bosne i Hercegovine i Slovensko udruženje privrednika u Bosni i Hercegovini potpisali su 05. juna 2025. godine Memorandum o saradnji, čime je uspostavljen okvir za jačanje i razvoj međusobnih poslovnih odnosa, unapređenje privrednih aktivnosti te stvaranje osnove za dugoročnu partnersku saradnju u oblastima od zajedničkog interesa.

Memorandum predviđa niz aktivnosti usmjerenih na promociju poslovne saradnje između članova dva udruženja, razmjenu informacija, koordinaciju poslovnih mreža, saradnju na sajmovima i konferencijama, te podršku zajedničkim projektima i istraživačkim inicijativama. Strane su se obavezale da će, u okviru svojih nadležnosti, raditi na uklanjanju prepreka koje mogu ometati rast trgovine i poslovanja, te podržavati razmjenu znanja, ekspertize i mogućnosti obuke među članovima.

Potpisivanjem Memoranduma, Udruženje poslodavaca u FBiH i Slovensko udruženje privrednika u BiH iskazali su opredijeljenost za jačanje bilateralnih privrednih odnosa i aktivno uključivanje u kreiranje povoljnog poslovnog ambijenta za svoje članove.

Memorandum je, ispred Udruženja poslodavaca u FBiH potpisao direktor Mario Nenadić, a ispred Slovenskog udruženja privrednika u BiH predsjednik Jure Peljhan. Potpisivanju je prisustvovao i ambasadora Slovenačkog biznis kluba Salih Lemeš.

Preporuka poslodavcima uslijed ekstremno visokih temperatura, pa time usloženja zaštite na radu i povećanje rizika za zdravlje radnika

Podsjećamo poslodavce na odredbe Zakona o zaštiti na radu u tom pravcu, a u skladu sa članom 9. Zakona o zaštiti na radu: „Uslijed vremenskih neprilika kao što su visoke ili niske temperature i sl., kao i u drugim stanjima potrebe ministarstvo može poslodavcima izdati preporuke o provođenju posebnih mjera zaštite, kojima će se spriječiti nastupanje štetnih posljedica po zdravlje radnika. Ukoliko vremenske neprilike ili druga stanja potrebe, uslijed kojih su izdate preporuke, potraju duže od pet dana, ministarstvo će obaviti konsultacije sa reprezentativnim udruženjima poslodavaca i radnika za teritorij Federacije”.

Ministar za rad i socijalnu politiku je izdao odgovarajuću preporuku koju integralno prenosimo i podržavamo.



„Obzirom na visoke temperature koje ovih dana zahvataju područje Federacije Bosne i Hercegovine, Federalno ministarstvo rada i socijalne politike podsjeća poslodavce na obavezu provođenja mjera zaštite zdravlja i sigurnosti radnika, posebno onih koji rade na otvorenom ili na poslovima sa povećanim rizikom po zdravlje i život radnika. U skladu sa Zakonom o zaštiti na radu, preporučujemo poslodavcima da preispitaju način organizacije rada i, gdje god je to moguće, prilagode radne procese kako bi se umanjile štetne posljedice visokih temperatura. Preporuka je da se u periodu od 11.00 do 17.00 sati, kada su temperature najviše, izbjegava obavljanje poslova na otvorenom, a da se ti poslovi, ako je moguće, nastave nakon tog perioda. U slučajevima kada to nije moguće, preporučuje se da se početak radnog vremena pomjeri na šest sati ujutro, kako bi se rad na otvorenom završio prije najvećih dnevnih vrućina. Posebnu pažnju potrebno je posvetiti radnicima koji rade na poslovima sa povećanim rizikom, kao i onima koji su izloženi štetnim uticajima u radnoj okolini. Također, preporučujemo poslodavcima da, gdje god postoji mogućnost, omoguće korištenje godišnjih odmora ili drugih vidova odsustva radnicima sa hroničnim oboljenjima. Važno je i da se prilagodi odijevanje radnika uslovima visokih temperatura, kako u preduzećima i ustanovama, tako i na službenim događajima, uključujući sjednice parlamenta, vlade i druge javne događaje. Federalno ministarstvo rada i socijalne politike poziva sve poslodavce da pokažu razumijevanje i prilagode radne procese u skladu sa vremenskim uslovima, jer zdravlje i sigurnost radnika moraju biti ispred svega“.

Poslodavci iz Kantona Sarajevo u razgovoru s predstavnicima Vlade KS: Potrebna snažnija podrška privredi i konkretniji koraci u realizaciji strateških projekata



Na inicijativu Udruženja poslodavaca Kantona Sarajevo održan je sastanak s premijerom i ministrima Vlade KS. Sastanak je iniciran s ciljem analize realiziranih zaključaka s prethodnih sastanaka i identifikacije ključnih izazova koji i dalje usporavaju razvoj poslovnog ambijenta u Kantonu Sarajevo.

Predstavnici poslodavaca podsjetili su članove Vlade na složenost trenutnog poslovnog okruženja, s naglaskom na činjenicu da u Kantonu Sarajevo još uvijek nije kvalitetno riješeno pitanje industrijskih zona zbog čega sve više privrednika razmatra premještanje poslovanja u druge kantone unutar Federacije.

Na sastanku se razgovaralo o ukidanju ili smanjenju parafiskalnih nameta, propisima i projektima iz oblasti privrede, naplati komunalne naknade za privredu, unapređenju sistema školstva u skladu s potrebama tržišta rada, projektima od zajedničkog interesa u Kantonu Sarajevo, dodjelama koncesija za solarne elektrane, radu ESV-a, kao i o problemima u sektoru upraviteljstva.

Također su problematizirana i pitanja razvoja poslovnog okruženja kroz projekte gradnje, izmjena urbanističkih planova i planova prilagodbe, kao i o sporij dinamici realizacije programa zapošljavanja.

Ispred Vlade KS sastanku je prisustvovao premijer Nihad UK, ministar privrede Zlatko Mijatović, ministrica za rad, socijalnu politiku i raseljena lica i izbjeglice Enda Pavić-Pečenković te ministar komunalne privrede, infrastrukture, prostornog uređenja, građenja i zaštite okoliša Mladen Pandurević.

U delegaciji poslodavaca učestvovali su predsjednik UPKS Suhad Ećo, direktor UPFBiH Mario Nenadić, predsjednik Skupštine UPKS Muhamed Pilav, kao i članovi Upravnog odbora UPKS Igor Baroš, Salih Lemeš, Eduard Jahjaefendić i Nijaz Skenderagić.

Predstavnici Udruženja naglasili su potrebu za partnerskim pristupom, bržom realizacijom dogovorenih mjera i konkretnim rezultatima koji će donijeti stvarne promjene privredi, posebno u Kantonu Sarajevo.

Predsjednik Udruženja poslodavaca Kantona Sarajevo Suad Ećo prisustvovao potpisivanju Protokola između Ministarstva za odgoj i obrazovanje Kantona Sarajevo i GOPA-e

Predsjednik Udruženja poslodavaca Kantona Sarajevo Suad Ećo je 27.06.2025. godine ispred Udruženja poslodavaca Kantona Sarajevo prisustvovao potpisivanju Protokola o saradnji sa Ministarstvom za odgoj i obrazovanje Kantona Sarajevo i GOPA-e.



Udruženje poslodavaca KS smatra neophodnom reformom obrazovanja, posebno srednje strukovno obrazovanje, te smatramo da ovakvi projekti mogu biti od velike pomoći, prvobitno kako bolje povezati poslodavce i obrazovne institucije, a sve u cilju kako da učenici još za vrijeme školovanja imaju priliku da rade kod poslodavaca i da se upoznaju o

procesima unutar firmi. Poslodavci mogu još za vrijeme školovanja tj. učenja profilisati kadar koji sutra može zaposliti unutar svojih kompanija.

Udruženje poslodavaca u FBiH i Kantona Sarajevo su partner u ovom projektu i učiniti će sve da osiguraju što veći broj firmi koje će potpisati ugovore o pružanju praktične nastave, te pozvati sve naše članice da se uključe u ovaj proces kako bismo zajedničkim snagama doprinijeli da učenici dobiju što kvalitetnije znanje, učenje kroz praktičan rad i da sutra kada završe školu zasnuju radne odnose, a ne da završavaju na biroima za zapošljavanje.



Udruženje poslodavaca i GOPA-e zahvalni su švicarskim vlastima na podršci na ovom važnom projektu, a također modeli koji se primjenjuju u Švicarskoj kada se radi o ovim pitanjima sigurno su primjer kojim se i vlasti u BiH trebaju rukovoditi, kako bi se poboljšali propisi, a potom i implementacija modela strukovnog obrazovanja u praksi.

Udruženje poslodavaca ponovo naglašava i podršku implementaciji ovog projekta GOPA-e koji očigledno daje prve rezultate u implementaciji.

Direktor UPFBiH učestvovao na okruglom stolu “Kako do održivog penzionog i zdravstvenog sistema – osiguranje kao dio rješenja”



Direktor Udruženja poslodavaca u FBiH Mario Nenadić prisustvovao je okruglom stolu "Kako do održivog penzionog i zdravstvenog sistema – osiguranje kao dio rješenja", održanom 09. juna 2025. godine, a kojem su prisustvovali predstavnici misije EU u BiH, ambasade SAD u BiH, Agencije za nadzor osiguranja FBiH te Stručnog savjeta Agencije, Agencije za osiguranje RS, Udruženja poslodavaca u FBiH, Privredne komore FBiH te Udruženja osiguravajućih društava FBiH i RS.

Skup je organizovala Američka trgovačka komora u BiH kao svojevrсни apel da relevantne institucije i ekspertna zajednica ponude alternative u pogledu nestabilnih zdravstvenih sistema i evidentno neodrživih penzionih sistema entiteta u BiH. Istakli su da stručnjaci upozoravaju o ozbiljnim posljedicama nefunkcionalnosti zdravstvenog ili čak potpunog kolapsa penzionog sistema, da poslodavci i građani izražavaju veliku zabrinutost te da dok se ne dese ozbiljne reforme ovih sistema, koje se nažalost ni ne naziru na političkim agendama, nužno je osigurati adekvatne alternative po uzoru na zemlje regiona.

U tom smislu, prisutni su razmatrali inicijative o poreskim olakšicama za građane koji ugovaraju dodatnu penzionu i zdravstvenu zaštitu za sebe i svoje porodice, kao i poreske olakšice za poslodavce koji svojim radnicima žele ugovoriti dobrovoljna penziona, životna ili zdravstvena osiguranja. Konstatovano je da u odnosu na Srbiju i Hrvatsku gdje su takve poreske olakšice odavno implementirane, u Republici Srpskoj postoje određene prolongacije



poreskih obaveza za penziona i životna osiguranja građana, ali ne i poslodavaca, dok u Federaciji BiH ne postoje nikakve poreske olakšice, niti za građane niti za poslodavce.

"Harmonizacija poreskih propisa u zemlji, uvođenje dokazano korisnih mehanizama poreskih olakšica implementiranih u regiji, smanjivanje pritiska na preopterećene javne zdravstvene i penzione sisteme, unaprjeđenje životnog standarda građana te posljedično smanjivanje odliva mladih ljudi, glavni su ciljevi ovog okruglog stola" poručili su organizatori.

Usaglašeni zaključci tj. konkretni prijedlozi izmjena propisa o porezu na dohodak i porezu na dobit će u narednim danima biti upućeni entitetskim ministarstvima finansija.

Učesnici su izrazili očekivanje da se predložena rješenja što prije implementiraju, a sve kako bi se građanima BiH učinio dostupnim veći izbor i kvalitetnija zdravstvena zaštita te sigurna penzija u budućnosti.

Predstavnica UPFBiH članica delegacije BiH na 113. zasjedanju Međunarodne konferencije rada u Ženevi

U sjedištu Međunarodne organizacije rada (ILO) u Ženevi od 03. do 14. juna 2025. godine održavalo se 113. zasjedanje Međunarodne konferencije rada kojem je prisustvovala i sekretarka Udruženja poslodavaca u FBiH Mersiha Jusić, kao članica delegacije Bosne i Hercegovine.

Međunarodna konferencija rada najvažniji je događaj u djelovanju MOR-a koja je specijalizirana agencija Ujedinjenih naroda, čiji je osnovni zadatak osiguranje boljih uvjeta rada i položaja radnika u cijelom svijetu te dostojanstvenog rada za sve.

Jusić je 11.06. prisustvovala jutarnjoj plenarnoj sjednici Konferencije rada. Tokom sjednice nastavljen je generalni segment konferencije sa izlaganjima predstavnika država članica, organizacija poslodavaca i radnika, kao i međunarodnih i regionalnih organizacija. Više delegacija iz zemalja članica osvrnulo se na izazove u vezi sa ekonomskim nejednakostima, promjenama u svijetu rada izazvanim tehnologijom, te nužnost socijalnog dijaloga u rješavanju tih pitanja.

U okviru posebnog programa, konferencija je prvi put u historiji organizovala plenarno obilježavanje Svjetskog dana borbe protiv dječjeg rada. Glavne poruke sa skupa uključuju poziv na jačanje inspekcijskih mehanizama, hitnu potrebu za uklanjanjem dječjeg rada u globalnim lancima snabdijevanja, te naglašavanje važnosti obrazovanja kao alternative dječjem radu.

U nastavku plenarne sjednice, delegati su raspravljali o biološkim rizicima na radu – gdje je predstavljen nacrt nove konvencije koja bi trebala da standardizira mjere zaštite radnika izloženih biološkim agensima, posebno nakon iskustava s pandemijom COVID-19.

Nastavljena su nacionalna izlaganja o aktuelnim izazovima u radu, među kojima su posebno istaknuti digitalizacija i automatizacija, migracije radne snage, nedostatak kvalifikovane radne snage.

Prisutnost na plenarnim sjednicama omogućila je uvid u globalne trendove u oblasti rada i zapošljavanja. Naglašena je važnost uloge organizacija poslodavaca i radnika u oblikovanju budućih standarda rada.



Drugog dana 12. juna 2025. godine, Jusić je prisustvovala Godišnjem forumu Globalne koalicije za socijalnu pravdu. Forum je okupio više od 370 predstavnika iz vlada, organizacija poslodavaca, sindikata, međunarodnih organizacija, akademske zajednice i civilnog društva. Događaj je bio usmjeren na razmjenu iskustava i prezentaciju aktivnosti koje doprinose promociji socijalne pravde kroz saradnju različitih sektora i partnera.

Forum je otvorio predsjednik Dominikanske Republike Luis Abinader, koji je istakao hitnu potrebu za socijalnom pravdom u današnjem svijetu rada.

Ministar rada i zapošljavanja Brazila Luiz Marinho, govoreći u ime svoje vlade i kao kopredsjedavajući Koordinacijskog odbora Koalicije, pohvalio je napore Koalicije da pređe s principa na praksu. Naglasio je da u 2025. godini prelaze sa zajedničkih ambicija na konkretan razvoj.

Generalni direktor Međunarodne organizacije rada Gilbert F. Hounbo, podržao je ovu poruku, naglašavajući brzu transformaciju Koalicije u potpuno operativnu platformu koja sada okuplja više od 370 partnera širom svijeta.

Tokom dana održano je šest panela na visokom nivou koji su se bavili najhitnijim izazovima globalne zajednice, odnosno promocijom dostojanstvenih plaća, pravednom tranzicijom kroz socijalni dijalog, osnaživanjem mladih, odgovornim poslovanjem, ekonomijom zasnovanom na ljudskim pravima i upotrebom vještačke inteligencije za društveni utjecaj.

Na Forumu su se također obratili značajni globalni lideri u oblasti rada, uključujući Roberta Suáreza Santosa, generalnog sekretara Međunarodne organizacije poslodavaca (IOE), i Luca Triangla, generalnog sekretara Međunarodne konfederacije sindikata (ITUC).

Nova članica UPFBiH - Fidges-Upravitelj d.o.o. Sarajevo



Osnova djelovanja privrednog društva je zakon o upravljanju zajedničkih dijelova zgrada (službene novine Kantona Sarajevo 19/2017 i 17/2018-isp). Zakonom se utvrđuju zajednički dijelovi zgrade, uzajamni odnos etažnih vlasnika, obaveza održavanja posebnog dijela zgrade, upravljanje zajedničkim dijelovima zgrade, odlučivanje etažnih vlasnika, obaveza javnih proizvođača, grada, općina, vlasnika novoizgrađenih zgrada, investitora i drugih lica u upravljanju i održavanju zajedničkih dijelova zgrade.

Više o kompaniji pročitajte [OVDJE](#).

Nova članica UPFBiH - UniCredit Bank d.d. Mostar



UniCredit Bank je vodeća banka u Bosni i Hercegovini i članica UniCredita, uspješne paneuropske bankarske grupe.

Na temelju pozicije vodeće banke u Bosni i Hercegovini, Banka nudi savremene proizvode i usluge - 24/7, online, na mobilnim platformama i putem mreže poslovnica.

UniCredit Bank d.d. Mostar je registrirana poslovna banka sa sjedištem u Bosni i Hercegovini. Sa ukupnom aktivom od 8.068,7 miliona KM i kapitalom od 1.090,1 miliona KM, Banka danas posluje kroz mrežu od 69 poslovnica koja pokriva čitav teritorij Bosne i Hercegovine, što proizvode i usluge UniCredit Bank čini dostupnim svakom klijentu, u svim većim gradovima i mjestima u Bosni i Hercegovini. UniCredit Bank je vodeća banka u Bosni i Hercegovini po većini pokazatelja poslovanja (podaci sa 31.12.2024.).

UniCredit Bank pruža cjelokupnu paletu bankovnih usluga koje uključuju poslovanje s pravnim osobama, građanima i finansijskim institucijama, poslovanje s inostranstvom, te usluge investicijskog bankarstva. Svoj poslovni uspjeh temelji na kontinuiranom podizanju kvalitete usluga i kreiranju proizvoda prema potrebama finansijskog tržišta, pri čemu u središte svog poslovanja uvijek stavlja klijenta. Uz uslužni model rada, kojim je osiguran segmentni pristup svakom klijentu i jednostavnost i efikasnost u pružanju usluga, UniCredit Bank uživa reputaciju stabilnog i pouzdanog partnera na tržištu Bosne i Hercegovine. Pripadnost Grupi UniCredit dodatno doprinosi snazi i stabilnosti UniCredit Bank. Više o Banci pročitajte [OVDJE](#).

Nova članica UPFBiH—Hetig d.o.o.



Kompanija Hetig d.o.o. je osnovana i decenijama radila poslove ugradnje hidro, elektro i termo instalacija. Poslovima upraviteljstva se počinju baviti 2002. godine.

Osnovnu djelatnost instalaterskih poslova (hidro, elektro, termo) ulaskom u poslove upraviteljstva proširuju sa građevinskim i završnim radovima u građevinarstvu te održavanjem liftova, koje poslove uspješno obavljaju.

Trenutno održavaju 550 objekata kolektivnog stanovanja sa cca 12.500 posebnih dijelova (stanova). Pored toga značajne aktivnosti ostvaruju u održavanju institucionalnih korisnika (održavaju privatna društva iz bankarskog sektora, naftne industrije, sektora usuga i sl.), kao i u domenu završnih radova u građevinarstvu kao što su: fasaderski (nove fasade i rekonstrukcije fasada, hidroizolacije, bravarija i td.).

Trenutno zapošljavaju cca 50 radnika različitih profila. Certificirani su upravnici za područje Kantona Sarajevo te certificirani održavatelji lift postrojenja-liftova.

Više o kompaniji pročitajte [OVDJE](#).

Nova članica UPFBiH - TIP-TOP d.o.o. Sarajevo



Osnovna djelatnost TIP-TOP-a je pružanje usluga održavanja i upravljanja stambenim objektima u skladu sa Zakonom o upravljanju zajedničkim dijelovima zgrade.

TIP-TOP UPRAVNIK je član Udruženja upravitelja/upravnika stambeno-poslovnih zgrada Federacije Bosne i Hercegovine pri Privrednoj/Gospodarskoj komori Federacije Bosne i Hercegovine i član Udruženja poslodavaca u Federaciji Bosne i Hercegovine.

Za obavljanje svoje djelatnosti posjeduju odgovarajuće odobrenje/certifikat izdat od strane nadležnog organa.

Poslove upravitelja/upravnika kompanija obavlja izuzetno profesionalno, jer zapošljava osoblje stručnog profila (inženjera, tehničara), VKV, KV majstora, higijeničarki, lift-montera, vodoinstalatera, limara, kao i osoblje građevinske, elektro, ekonomske i pravne struke potrebne za obavljanje poslova upraviteljstva. Obzirom na dugogodišnje uspješno poslovanje i iskustvo stečeno njime u mogućnosti su iznijeti svakom korisniku svoja iskustva i dati preporuku najkvalitetnijeg rješenja.

Više o kompaniji pročitajte [OVDJE](#).

UPFBiH povodom smrti prof. dr. Željka Šaina: Odlazak čovjeka znanja, vrijednosti i ljudskosti



Rukovodstvo i članovi Udruženja poslodavaca u Federaciji Bosne i Hercegovine sa tugom i žalošću su primili vijest o smrti prof. dr. Željka Šaina, profesora emeritusa Ekonomskog fakulteta Univerziteta u Sarajevu.

Udruženje je imalo čast i privilegiju sarađivati s čovjekom izuzetne stručnosti, integriteta i ljudskosti. Njegovo znanje i posvećenost ostavit će neizbrisiv trag u akademskoj, stručnoj i poslovnoj zajednici Bosne i Hercegovine.

Za Udruženje poslodavaca u FBiH, prof. dr. Šain bio je mnogo više od saradnika – bio je partner, savjetnik i prijatelj u zajedničkim naporima da unaprijedimo poslovni ambijent u našoj zemlji. Cijenili smo njegovu stručnost, ali još više njegovu otvorenost, razumijevanje i spremnost da uvijek pomogne.

Njegov odlazak predstavlja neizmjeran gubitak – gubimo velikog stručnjaka i izuzetnog čovjeka. Njegov doprinos stručnoj zajednici, poslovnom sektoru i obrazovanju ostat će trajno urezan u sjećanje svih nas.



UDRUŽENJE POSLODAVACA

UDRUŽENJE POSLODAVACA U FBiH
MARŠALA TITA 6, 71 000 SARAJEVO

TEL: 00 387 33 552 460

FAX: 00 387 33 552 461

MAIL: info@upfbih.ba

WEB: www.upfbih.ba